

অন্য ইচ্ছায়

একটা পাখিরও থাকে এক গাছ থেকে অন্য গাছে
এক ডাল থেকে অন্য ডালে
এক ঋতু থেকে অন্য ঋতুর সন্ধিতে
বাসা বানাবার ইচ্ছা থাকে
চোখ খুলে প্রত্যেক সকালে রঙ-মাখা বিভিন্ন ইচ্ছার
ওড়াউড়ি দেখা---
একটা নৌকোরও ইচ্ছা হয়
এক নদী থেকে অন্য নদী
এক জল থেকে অন্য জল
এক স্নেহ থেকে অন্য স্নেহে
একটু ভেসে যাওয়া ---
এবার আমার যদি ইচ্ছে হয় -- একটা দিনের কাছ থেকে
অন্য এক সম্পর্কের দিনে চলে যেতে
একটা রাতের কাছ থেকে -- অন্য এক রাত্রির সংসর্গে
চলে যেতে
এক দেহগন্ধ থেকে অন্য এক রমণীর শরীরের ঘামে আর ঘ্রাণে
মিশে যেতে
তাহলে আমি কি কোনো দণ্ডবিধিমাতে অপরাধী।

রত্নের হাজারা

